

同治元年

嘯亭雜錄卷五

緬甸歸誠本末

緬夷古朱波地。自古不通中國。宋寧宗時。史志始有其名。元世祖遣兵三征之。責其貢賦而還。明初設宣慰司。聊以羈縻。間亦嘗修貢賦而還。其事詳正史。其時緬地不過數千里。附近提涼猛。養猛拱猛。密司蠻。暮木邦。落卓來卡猛。迺擁會金坎。毋得馬大山。宋賽錫箔猛。樟猛。素孟艮。整欠。整賣諸大土司。尚非所有。及莽體瑞之子莽應裏。漸強盛。明所設三宣六慰。大抵皆服屬於緬。本朝順治十五年。大兵破貴州。明主由榔奔緬甸。時定西將軍愛星阿。吳三桂等。於十八年十一月入緬。師至木邦。白文選降於茶山。康熙元年。緬酋自相篡弑。殺明宗室。及黔國公沐天波等數百人。將軍等索明主。緬人不與。師至阿瓦。緬人懼。遂獻明主。師歸。緬人遂不通朝貢。其世次亦不可考。至雍正九年。緬酋與整邁構兵。緬目蟒古叮。在九龍江。遇守備燕鳴春。有告知國王明年進貢之語。鄂文端公以聞。得旨宜聽其自便。不必有意設法誘致。乾隆十一年。開茂隆廠。雲南永昌順寧。徼外有玃狽。其地北接耿馬土司界。西接木邦界。南接生玃狽界。東接孟艮土司界。地方二千餘里。其長曰蚌筮。自號葫蘆王。不知其所自始。有世傳鐵印。緬文曰法龍湫諸木隆。華言

大小箐之長也。所居木城草房，戴金葉帽似盔，穿花衣，俱跣足。夷民山居穴處，以布纏頭，敝衣短褲，刀耕火種，軍器惟刀鏢弓弩。又有夷目蚌坎，率猛莽恩莽，悶俱係蚌筑弟兄叔姪，分掌地方，亦不屬於緬酋。浼耿馬土司罕世屏代稟稱，願歸順境內。茂隆廠自前明開採時，甚旺。廠民吳尚賢等議給山水租銀，不敢受。請照內地廠例抽課報稅，以作貢物。總督張允隨奏言：葫蘆乃係化外野夷，輸誠內附，請將此項廠課飭令減半抽收，一半賞給該酋長，以慰遠人之心。得旨允行。十三年鎮康土司刀悶鼎報緬夷願通職貢，不許。十四年二月，茂隆廠吳尚賢入緬甸。先是迤西道承差賈興儒奉差往茂隆廠訪緝，廠犯鄒啟周張寬果等。茂隆廠委吳尚賢於十月丙戌派帶兵一百餘人分起往訪緝。壬辰，吳尚賢帶練兵八百餘人，賈興儒隨同自廠起身。癸卯至幹猛，十五年正月朔日乙巳，廠練已擒鄒張二犯至幹猛，押解回廠。吳尚賢帶練兵一千二百餘人前赴緬甸。時上年緬人所遣土目五人請進貢者尚在鎮康。吳尚賢要令前導，丁未自幹猛起程。庚戌至木邦，木邦令頭目猛占等八十餘人從之。丁巳至錫箔，庚子至宋賽。吳尚賢等於所過土司地方皆有餽遺，遂致書於貴家。貴家者，隨明主人緬之官族，其子孫淪於緬，自署曰貴家。據波龍廠採銀，貴家頭目宮裏雁素與緬甸有隙，因率兵阻之。吳尚賢至

麻里脚洪。又遣人致書講和。貴家竊其來使。吳尚賢遂會緬兵三千餘人至德嶺城。與貴家數挑戰。三月庚戌。貴家出近敵詐敗。吳尚賢前赴之。為貴家所敗。緬甸復遣人和解之。吳尚賢渡麻里脚洪回廠。賈興儒於五月癸丑。帶張寬果回大理。尚賢意欲邀功。因謀說緬酋莽達拉遣使入貢。莽亦荒淫無道。眾叛親離。遂從其言。具表來降。十五年七月。葫蘆茂隆廠課長吳尚賢稟稱。緬甸國王莽達拉情願稱臣納貢。永作外藩。命工匠製造金銀二鈿。篆刻表文。又造貼金寶塔裝載黃亭毡緞緬布土物。各色馴象八隻入貢。又貢皇太后馴象二隻。毡緞緬布等物。差彼國大臣一員。頭目四人。象奴夷眾數十人。出境過江。於四月已抵邊界。請代奏。督撫令司道會議。布政使宮爾勸會按察使糧鹽巡東迤西四道議。以前鎮康土州刀悶鼎稟報緬酋請通貢。已不許。今稟內絕不言及。且明置緬甸宣慰司。表內未稱宣慰舊銜。又有蟻穴自封。夜郎天外之言。更不敘明使臣銜名。吳尚賢前稟與今稟。又復互異。至木邦乃緬甸所轄。中外攸分。准木邦投誠。木邦即緬甸之叛逆。必至大起釁端。亦有妨於國體。吳尚賢初到廠地。恃強凌弱。今率緬甸來歸。實有邀功之意。且外國歸誠。亦斷無借一廠民為媒進。將來緬甸設有寇警。必另求援兵。不應則失統御之體。應之則苦師旅之煩。恐鞭長莫及。反難善處。況前明頻通賦

貢受侵擾者數十年。我朝久置包荒。獲寧謐者百餘載。邊境之教寧。原不闕乎遠人之賓服。其不可信及不可行者各四。而巡撫圖爾炳阿竟據稟詞並表文入告。表文曰。緬甸國王莽達拉謹奏。盛朝統御中外。九服承流。如日月經躔。陽春煦物。無有遠近。羣樂甄陶。至我皇上。德隆三極。道總百王。洋溢聲名。萬邦率服。緬甸近在邊徼。河清海晏。物阜民和。知中國之有聖人。臣等願充外藩。備物致貢。祈准起程。由滇赴京。仰觀天顏。欽聆諭旨。云云。十六年六月。得旨准貢。凡筵宴賞賚。一應接待事宜。俱照各國王貢使之例。以示綏懷。因遣官伴使赴京入貢。至十月。貢使回滇。尋逮吳尚賢。尚賢本無籍馬脚於茂隆山開廠。督臣張允隨僉委充當課長。積私財捐通判職銜。於廠地製造鎗刀弓弩。張黃蓋以自豪。年來侵蝕長賞錢三萬二千餘兩。前誣鄒啟周搶掠外域致死。後令楊公四等於廠外地鎗斃客民彭錫爵。經屍弟彭錫祿控告。是歲充通事隨緬使入貢。於途挾重賈。招搖生事。總督愛必達奏請革職。於十六年九月。拏審擬大辟。旨未下。瘐死於獄。十七年三月。敏家攻阿瓦。破其城。上年十一月。緬國貢使回抵耿馬。聞滾弄江外有警。十二月耿馬土司罕國檣遣人伴送緬使至木邦。先是六月內。緬酋遣子糯喇他蟒左同弟色亢瑞凍至猛遮城迎貢使未至。是年三月。敏家破阿瓦城。以率敏拖五八喇扎居

之緬酋避居約提即憂撒壩等處居無定所其子糯喇他蟒左亦避居錫箔四月緬使抵猛迺搭建亭閣貯勅旨御賜欲俟其國平定始旋十八年九月丙寅木疏頭人甕藉牙與貴家戰勝之乃令貴家及約提即之兵共五千人圍敏家又景賣卡普幹官之子占桑蟒率衆至猛迺亦欲據緬十九年正月緬使及緬酋子遣人齎蒲葉書至耿馬未及回國緬酋莽達拉即為得楞錫箔所殺子色亢瑞凍出奔緬國無主甕藉牙起兵聲言復仇糾合緬屬各土目擊敗得楞諸夷遂自立於木梳城尋徙阿瓦凡緬國舊屬土司皆遣人降服之有不服者輒治兵攻擊無虛日貴家據波龍廠採銀向有歲幣至是不復輸甕藉牙擊潰之追至猛迺獲所貯勅書御賜遣人四出求緬酋子色亢瑞凍避入木邦甕藉牙追之二十年六月耿馬孟定等土司以木邦警聞十月辛亥色亢瑞凍挈妻喇打那疊玉及親屬頭目男婦等八十餘人緬僧二人渡江入猛卯總督愛必達巡撫郭一裕會檄猛卯土司衍現遣之使去越二日始出境甕藉牙猶遣人在木邦城徵象隻索童女木邦土司罕蟒底乃置色亢瑞凍於滾弄江內二十一年二月復遷至蠻弄寨建草樓數楹夷衆挈盒餽饗殮焉益逼近內地之耿馬鎮康督撫會檄防禦甚嚴六月壬辰景賣屬之猛放緬目波顛遣老緬四人來迎色亢瑞凍遂挈家由白沙水渡滾弄

江而南波顛率衆五十餘人迎赴猛放猛放至木邦計三十餘程此後遂莫知其蹤二十三年二月緬酋甕藉牙攻陷木邦木邦在耿馬外為耿馬孟定鎮康孟連之藩籬落卓土司地大而強甕藉牙據有阿瓦落卓首先歸附於是甕藉牙寇劫波龍廠遂威脇木邦索其賄貴家宮裏雁與結此國人糾約廠衆至木梳舖劫殺兵始退時緬酋莽達喇之族弟占朵莽者先分居景邁宮裏雁遙附應之十二月宮裏雁謀攻落卓會占朵莽及木邦土官之弟罕黑至落卓刦殺落卓大敗復引緬酋甕藉牙及各土酋之兵謀攻貴家及木邦以泄其忿二十四年三月落卓先鋒兵六千餘人至腊戍是時占朵莽率猛交兵一千人駐猛迺乘落卓兵練遠出間道已赴落卓木邦土司罕蟒底聞緬甸落卓兵至乃屯發練堵禦遂遷其家屬於大橋邦囊翼日與宮裏雁出白小坡與落卓決戰越二日木邦城陷罕蟒底奔蟒憂家屬渡滾弄江至那離又遷於錫峨緬兵入踞木邦人民逃竄波龍廠衆多歸於內地沿邊土司撥練防守宮裏雁率兵練男婦二千餘人渡滾弄江奔蠻東蠻弄勢甚窮蹙又由白沙水駐南湘欲假道孟艮耿馬往井荊抵求占朵蟒所在會兵復戰而占朵蟒已襲破落卓率兵練還救木邦木邦復定罕蟒底宮裏雁復渡江回永昌鎮府聞報率兵二百名於四月辛酉出禦行抵姚關旋即撤回二十五年

緬酋襲藉牙死。其子莽紀覺嗣。與各部構兵如故。二十七年正月。宮裏雁被緬酋追殺甚急。由猛榜奔至耿馬。又由孟定之邦模南板入莽旦。窮蹙無歸。五月丁酉。至猛戛。並至孟連之猛尹。散處各村寨。初宮裏雁自阿瓦奔出。帶練一千三百人。至木邦。撥給占朵莽五百人。實止帶練八百人。又脇從阿瓦緬子。木邦擺夷及擄掠男婦共三千餘人。既抵猛尹。猛尹頭目率衆驅之。宮裏雁乞內附。寄住孟連地方。孟連土司刀派春。遂赴猛尹收其兵器。戶索銀三兩。將其衆安插於猛尹各園寨。宮裏雁不欲受土司管轄。已相嗟怨。總督吳達善知其有七寶鞍。乃亡明至寶。太監王坤由北京內庫竊去者。向其索取。宮裏雁以其祖宗所傳重物。恡不與。吳遂挈其妾婢六人。赴石牛廠。刀派春率宮裏雁之妻孥占。男婦一千餘人。至孟連城。刀派春又向孃占及頭目撒拉朵。牽牛馬童女。以賄吳達善。孃占忿於閏五月丁丑夜。糾衆焚殺孟連城。刀派春家屬三十餘人。俱被害。逃免者僅應襲刀派先及刀派春妾二人。戊寅。孃占撒拉朵率衆逃散。至猛養并狃各處。刀派春族兄弟派英聞變。率練追剿。而猛養并狃兩處夷衆亦各要路刼殺。孃占大敗。逃竄無踪。派英寄信石牛廠民龍得位王天和等。將宮裏雁好為款留。宮裏雁實不知也。七月永昌守楊重毅檄耿馬土司罕國指帶練誘擒宮裏雁。並具妾婢六人。及另

行拏獲之餘黨阿占阿九二人囚解赴省布政使姚永泰曰孟連之變雁不與知
況其夫妻不睦雁是以避居兩地今若留雁可以為緬酋之忌憚不可代敵戮仇
也按察使張坦麟審稱宮裏雁雖堅供不知情但勢窮來歸先令妻屬詭計歸服
以致其刼掠罪有攸歸且連年與緬酋擄殺既經拏獲斷不可仍留夷地之害應
正法吳達善以前鞍不與故切齒於雁遂左袒張議適緬酋至木邦聲言前往整
欠景線相戰因遣頭目蟒散至孟連索宮裏雁所脇從之緬人刀派永悉將緬眾
遣回益知內地虛實十月丁未殺宮裏雁以其妾婢分給功臣吳達善既遂其志
乃檄緬人諭以宮裏雁業經誅殺宮裏雁之妻擄占及兇目等當即拏送以靖餘
孽時擄占已嫁莽酋弟情駁故緬人以為有心羞指其淫行益加忿恨會木邦罕
勾結遂滋擾內地之耿馬耿馬雖屬內地於緬亦有歲幣緬目普拉布率兵來
索關入孟定執土司罕大興兵及茂隆廠時永順鎮田允中調隣近各營官兵親
率進剿吳達善恐其連兵致敗露其前事乃飛檄田鎮責其輕率遂還師耿馬土
司罕國楷率兵禦緬於石牛廠廠委周德會聞田允中進發恃為屏障率其廠練
於滾弄江截緬人歸路擊殺普拉布吳達善以周德會為殺良冒功竟置之於法
而緬人益輕中國二十八年十一月緬人犯猛籠莽紀覺既兼并諸土司東之景

線整賣孟良整欠。皆以力戰迫脇附從。復言普洱之十三版纳原隸緬甸。遣播定
黔寄緬文於車里宣慰司。索其貢獻。率賊眾至打樂隘口。猛遮撥練禦之。遂犯猛
籠。刼掠村寨。猛籠不能禦。土弁刀乃占召彝等被害。普洱鎮劉德成領兵至思茅。
遣兵前赴九龍江。吳達善飭調元江土練未至。次年春。緬賊始退。時復分兵至我
遮放邊外。揚言來索木邦官。吳達善畏蒞。惟戒官兵不與之戰而已。會莽紀覺病
死。賊乃退。三十年。莽紀覺死。其弟情駁嗣。時賊勢愈肆。強橫其西之結些南之白
古大姑拉小姑拉。悉為其所據。是年賊犯普洱。普洱在省城之西南。幅員遼闊。與
緬甸之孟良孟勇整欠接壤。南通南掌。所屬有九龍江車里宣慰司。及倚邦土守
備。六困土守備。猛遮土千總。普藤土千總。猛阿猛籠猛腊猛旺整董猛烏得土
把總。大小十三土司。俗稱十三猛。又稱十三版纳。其間九龍江猛遮猛阿猛籠猛
腊。並猛遮所屬之猛海。及九龍江所屬之橄欖壩小猛崙猛彝補角等處。均逼近
外域。上年九月。匪酋召播率眾一百三十餘人。至九龍江。要車里宣慰司。前赴阿
瓦會盟。時吳達善已調陝甘。總督為劉藻老儒也。不識事體。以王者須正疆里為
言。命驅逐之。明年春。賊人飽颺始去。五月。賊眾復由整欠渡九龍江。至猛腊。烏得
猛烏整董猛旺。各土弁率眾驅逐。賊踞猛腊猛彝。普洱鎮劉德成遣土目擒獲賊

目以信波半阿浥等解審正法。是時緬酋雖恣肆亦不敢抗官兵。實遣人於十三猛索賦十三猛。係雍正年招降而亦輸賦於緬。以信三人傳為在十三猛之貿易人。悉殲之。賊因憤而思逞。十月緬賊復由整欠入猛拿。整欠頭目召教其子召淵與車里宣慰司為一族。車里所轄之猛拿頭目以先拿召教惡其不遜。遂糾緬賊攻之。孟艮頭目召丙召散以同祖弟兄分掌其地。召丙遂召散召散約頭目召猛照同攻召丙。召丙逃入內地之鎮沅府乞降。召散遂有孟艮之地。後結緬賊追逐召丙。於是緬賊益出入九龍江一帶矣。十月提督達啟由會城巡閱赴普洱十一抵普城。即聞賊耗。普洱劉德成率本鎮八百名前往。思茅一帶彈壓。提督移知總督亦前往。劉藻即移兵茨通。提督達啟亦進駐思茅。劉藻聞緬人入犯。先遣後營遊擊明浩齎銀三千兩備犒。復遣標兵八百人以甫抵任八日之參將何瓊詔及員弁三十八人率之前往援剿。時緬賊西由孟艮入打樂。至猛遮九龍江東由整欠至整哈渡。至橄欖壩。猛阿之整控渡亦復有賊。達啟分兵四出堵禦。何瓊詔明浩及守備楊崐帶兵一百人前赴猛阿。何瓊詔等素無備止於江干。守備楊崐率四十人於野刻先濟。整控渡何瓊詔等從之。至午刻官兵悉渡。甫行數里而楊崐兵已覆瓊。詔兵猝遇賊。各倉皇避匿。劉藻遂以何瓊詔陣亡入告。而何瓊詔及軍

衆等後先由威遠所屬蒙撒江歸。劉藻復以聞上察其詐。切責督臣。命鞠瓊詔等。三十一年總督劉藻自殺。劉自遣標兵後。屢接提鎮啟稟。知賊勢已猖。欲躬往。按察使良卿復從史之止。挈丞令陳元震唐思等數員。午夜猝發。於除夕抵普洱。進駐思茅。乃檄調各營兵數千。是時瓊詔等已失事。賊勢日熾。傳烽逼近思茅城。劉乃退於普洱府治。劉本懦弱。既已前奏失旨。時分調各路兵之檄。時發時止。人莫知所從。以致漫無經畫。會上以陝甘總督楊應琚調任。而降劉為巡撫。劉益懼。無所措手足。因於三月癸酉中夜。挑燈默坐。驅侍者出。自剄不殊。宛轉牀榻間。七日乃死。三月所調兵已集。楚姚鎮華封具報。以召丙為嚮導。率兵由猛遮克孟艮。召散逃遁無踪。普洱鎮劉德成具報。以叻先拿為嚮導。率兵由橄欖壩至猛拿。副將孫爾桂具報。由車里至猛龍。會攻整欠克之。召教降。提督達啟。由猛龍攻猛勇。召齊降。時瘴癘大作。賊衆亦退。是月丙戌。總督楊應琚至普洱。是日以捷聞。請賞給召丙叻先拿三品指揮使職銜。管理土務。孟艮整欠各留兵八百名。猛散留兵二百名駐守。五月提督達啟卒於軍。啟捍禦邊城。頗有勞績。在孟艮受瘴癘卒。滇人思之。實從無一存者。以李勳代。李至數月。亦受瘴卒。九月猛龍沙人暨猛勇補哈猛撒等。相繼內附。而總兵華封復招撫景線整賣孟艮小頭目等。詣軍門投誠。是年

四月。楊應琚既綏定普洱。回省城。以前巡撫常鈞有莽案事畢。既辦。木匪奏。爰飭調文武。及習熟外域情形者。至省商辦。騰越副將趙宏榜。首陳木邦蠻暮各土司。願內附。緬酋勢孤。易取狀。騰越之西南。為南甸。干崖。蓋達。三土司。是即所稱三宣者。為騰越之屏翰。三宣之外。為蠻暮。蠻暮之西。為曼鳩。猛拱。猛養。東為猛密。波龍。自騰越關外。復有止丹。弄種。各山寨。野人族類甚繁。是時聞各土司。樂於內附。又傳言情駁之母。勸其子臣服。時有機可乘。趙宏榜。楚人。少為波龍。殿丁。習緬事。野人頭目。皆與之善。總督楊應琚。初弗聽。曰。吾官至一品。年逾七十。復何求。而以貪功。開邊釁乎。趙宏榜。復慫恿之。楊信其言。於是令道鎮府州官。各議。迤西道陳作梅。永順鎮總兵烏爾登額。永昌知府陳大呂。皆議以賊勢甚大。邊釁不可開。騰越知州陳廷獻。則銳意進取。楊應琚。怒阻議者。陳大呂。懼。改初議。烏爾登額。阻益力。書凡七上。楊滋不悅。而陳大呂。陳廷獻。革職。開化同知陳元震。即馳檄緬甸。號稱合各國精兵五十萬。大砲千尊。有大樹將軍統領。以震懾之。又密布牒。分道通事。至各土司。說降。初。楊應琚。議。檄調官兵八千人。至是。祇調三千人。俟八月。到永昌。蠻暮木邦降後。其附近各土司。再相機辦理。六月。趙宏榜。帶兵五百名。抵鐵壁關。陳元震。遣人至蠻暮。時土司瑞團。赴阿瓦未歸。其母妻及弟坤商。以所屬五六十

寨三千餘戶請降。宏榜遂率二百人。龍袞蠻暮之新街。一鼓克之。坤商率頭目於七月甲午赴永昌。途次為趙宏榜要至軍營。宏榜關外。無止丹弄種六醋喇痛邦領蚌林暮習魯緬喇同草朵習董各山寨野人。八月乙卯。陳元震以憂鳩允冒投降。頭目線蔑猛猛捧甕撒老安等男婦五人解報。陳廷獻報猛密土司亦欲乞降。遂關請永順鎮調集兵馬。欲領赴猛密。未行。而趙宏榜先於七月內赴新街。瑞團自緬甸回至連帕請降。猛密所屬之猛連壩頭目線官猛赴新街軍營請降。趙宏榜又遣人招撫猛拱猛養。九月木邦降。先是木邦既屢遭兵。而屬緬酋立困相為頭目。又執木邦土司罕宋法之弟罕蟬。立於阿瓦城。以為質。復立者皆以監之者。皆者。緬官名也。既而罕宋法殺困相等三十餘人。乞內附。會罕宋法即死。時者皆尚在木邦。木邦夷衆請立其弟線甕團。緬酋不允。又執其土舍法坤象。傳聞於內地。緬寧通判富森招之。然甕團亦未敢驟降。未幾其姪線五格為質於阿瓦。聞木邦變。殺守者竄歸。甕團於是內附。富森并招撫緬寧以外莽抵帶其長至永昌。俱加褒獎。時緬酋已調遣賊衆數萬。分道四出。一由蠻暮。一由猛密。一由木邦。一由滾弄江。於木邦之猛樟大視罕錫箔宋寨等處。皆駐有重兵。我兵定議以禦之。是月總督楊應琚赴永昌受降。時陳大呂等以蠻暮之新街。踞緬甸水陸之衝。自

新街下連帕水路四五日可到。緬甸自猛密波龍陸路七八日可到。緬甸計日可望成功。趙宏榜兵前已在新街。新街在鐵壁關外江干。為互市之所。兵丁受暑者多。緬賊於八月中旬遣頭目覘軍營。為乞降狀。赴宏榜不察。犒而遣之。時新街兵少。各路警報時至。楊應琚乃飭永順鎮都司劉天佑。騰越都司馬拱垣。貢兵四百餘。自翁冷出關。於九月庚午到新街。丁亥趙宏榜祭纛饗士卒。緬賊乘船猝至。帆檣啣接。倏忽蜂擁。蟻屯者數千人。登岸攻柵。翌日賊勢益張。都司劉天佑死之。趙宏榜收病傷各兵。同軍械於草房內焚燒。乃與馬拱垣等潰圍間道。由野人寨退駐鐵壁關。瑞圍至鐵壁關。趙宏榜安置於隴川。其族屬人民遁出關外野人村寨。時總督楊應琚方行次永平縣之太平鋪。聞警報即邁疾。乃加調官兵分剿。十一月永北鎮朱崙進攻楞木不克。退守隴川。是時東路永順鎮烏爾發額帶兵至宛頂。欲進攻木邦。西路永北鎮朱崙帶兵駐鐵壁關。欲進攻蠻暮。以復新街。雲南提督李時升於十一月甲戌自永昌起程。辛巳至鐵壁關。緬賊自新街至林岡固守。我兵四千餘人亦於楞木山頭分佈七營。壬午朱崙出鐵壁關。癸未至楞木。緬賊請於次日會戰。甲申卯刻賊約二萬眾喊叫前進。我兵營柵踞山之顛。向下施放鎗礮。殺賊甚眾。賊復緣箐盤繞。向上仰攻。我兵施放連環鎗礮。殺賊數千而不戢。

朱崙見賊勢猖獗。至丁亥相持者四日。請援甚急。提督李時升撥宛領兵七百名赴援。是日我兵出柵下攻賊。佯敗。山腰礮火起。官兵受傷者二百餘人。戊子賊張象擋牌。自辰至午。方放連環礮。擋牌忽撤。已立營柵一座。益逼近大營。李時升告急於楊應琚。不應。已丑官兵堅壁不出。庚寅賊詐為乞罷兵。楊應琚乃以楞木之掇入告。是時賊甚眾。又限於林谷阻深。朱崙既不能克復新街。而緬賊先犯萬仞關。竟入蓋達矣。蔓延遂至戶腊。撒賊氛四熾。燒劫村寨。李時升又調楞木之兵二千名應援。萬仞關在騰越西。與神護巨石二關並列。時神護巨石每關僅兵一百餘名。萬仞駐兵二百名。都司馬拱垣領之。馬拱垣以拏解奸犯。回至千崖。十一月己丑。緬賊約二千餘眾。由曼鳩遂犯萬仞關而入。時都司張世雄領兵四百名駐蓋達。赴銅壁。謀與駐守之遊擊班第會攻賊。眾賊益近。至蓋達焚掠土司城及太平街居民。壬辰賊抵銅壁關下。班第等於翁冷立柵抵禦。賊眾仰攻。相持者竟日。賊旋縱火焚燒。官兵撤回關上。甲午賊眾潛踰關。在山嶺架礮於樹下。擊火光四起。官兵潰散。班第出關。賊兵躡其後。死之。張世雄間道回營。賊遂踞銅壁關。時李時升駐鐵壁關。聞警。臨沅鎮總兵劉德成領曲尋鎮兵七百。尋需營兵二百。游擊清泰領撫標兵四百。游擊郝壯猷領督標兵八百。已於丙辰出曩宋關至南甸。李

時升遣游擊馬成龍守備馬雲沈洪等帶兵九百名由戶撒前攻檄催總兵劉德成等從後夾擊劉德成既擁兵于崖遷延不進馬成龍等復退回海巴江外不能徑渡李時升差把總田榮督戰戊子馬成龍等始渡江水沒腰火藥皆濕伏賊突起冲殺游擊馬成龍陣亡守備汪紀亦於壩尾陣亡兵丁傷亡者衆僅存未及渡江之七八十人十二月丁酉賊渡江至戶撒李時升遣游擊邵應泌守備劉世雄等帶官兵一千二百名前赴戶撒救援賊連營扎駐於平原壬寅李時升遣副將陳廷蛟都司陳斌抽撥楞木官兵六百名甲辰李時升又遣游擊劉國良都司張璋周印守備程轍等帶兵一千名均赴戶撒山頭樹立營柵賊衆來攻我兵隨鎗砲拒敵時劉德成尚駐于崖飲酒高會擄婦女縱兵淫虐取富戶貲以為纏頭費李時升連檄七次劉德成擁兵不進作跋扈語總督楊應琚聞之遣緬寧通判富森持令督戰不從則以軍法從事劉不得已始於乙巳日領兵抵盞達賊既見戶撒兵漸加添而又懼劉德成之擊其後也是夜於營外添設號火散放馬匹仍作疑兵賊已潛退我兵不知尚鎗砲竟夕至曉踐入其柵皆空壘也始覺其遁總督楊應琚遂以大捷奏聞是時緬賊方議乞和而兵復至先是李時升以兵寡故屢檄楞木兵時朱崙遂以欲攻其外先清其內為辭決意撤兵十二月己亥緬目莽